


寒  
松  
堂  
集  
四





寒松堂集

(四)

魏象樞著

# 寒松堂集卷七

## 書簡 尺牘

### 與蔡子虛同年書

前歲孫壽周寄到華翰。備悉起居。數載渴懷。對茲忻慰。足下家學淵源。認真做天下事。久勞於外。無愧平生。僕卜之有素。長者何自歉也。幸勉爲之。僕自亥歲邀恩歸養。幸今年老母七十有六矣。菽水之餘。日與父老子弟輩砥礪孝友。是僕里居第一事。有暇好讀儒書。謬集儒言錄之選。茲錄自宋以後諸儒羽翼道統者悉載焉。大約分大儒醇儒通儒名儒四類。愧僕至愚極陋。不敢妄擬性理之續。既經七載。粗就一編。聊俟後之君子而已。又僕家居第二事也。日夕編摩。藉以收斂心志。分別人禽關頭。挽回田園詩酒陋習。不無小補。特敢爲知己言之。仰乞開牖。崔後渠洵詞承惠。已窺津涯。呂新吾呻吟集。從他處抄得過半。餘尙未聞。呂豫石止得孝經本義。而全集全無。王浚川文集。曾在都門見之。迄今猶缺。沈龍江文章事業。表著當時。尙以未見全集爲憾。止得社約一冊耳。孟雲浦文集。則全未寓目矣。此皆中州儒者也。足下宦於其鄉。有表章之責。且留心聖學。家有淵源。別所聞見。一一購求示我。千秋事物。竊恐草草成書。必致掛一而漏萬也。茲因舍親張邑丞赴任。其人孝友篤實。藉手致候。近刻五種。聊代晤言。儻有好音。竝所懇諸書。

付下爲使。臨楮依依。

寄周伯衡書

可亭一別。悵望雲山久之。然非尋常寒溫比也。以太夫人春秋高。有子宦遊。南北就養。鄉讀母老還家。無定日之句。日復一日。堪再讀乎。僕己亥邀恩歸養矣。身在膝下。視鶴髮鳩杖。未嘗不念足下此心也。一訊之魯。一劉君再訊之我。存成子。不識此心。可達左右否。昨出都時。檢書篋所存手札一二。惟恐散佚。卽裝潢成卷。屬霍君龍槐題之。曰同蘭尺牘。攜歸展玩。如見伊人。塞垣孤陋。去京洛諸友漸遠。求如知己道誼深切者。更不多得。詩文都廢盡矣。前歲恭擬先皇帝輓詞。中夜徘徊。竟不成咏。不得已而集少陵諸句志哀耳。其他可知也。年來菽水之餘。頗讀先儒遺書。津津有味。且讀且選。謬集語錄之粹者。編曰儒言。竊惟性理而下。自元至明。道統相傳。不宜中斷。必有起而續之者。採輯大略。豈異人任。僕不才。彙成一書。姓氏俱在江右。諸羅諸鄒。全傳全集。再須細訂。而苦於購求。今俱爲足下部內地。不虞副在名山矣。惟羅整庵先生之困知記。羅念庵先生之石蓮洞集。曩雖都下借觀。尤切切望之者。僕之飲食夢寐於兩先生。與七千里故人無異也。江山相助。佳著必多。一切求益焉。因馬弁赴任之便。不敢不一起居。爲叱名候太夫人健飯。令嗣學古有年。頃八股報罷。正其奮筆時矣。勉旃勉旃。僕里居無恙。日與父老子弟砥礪孝友而外。無復他事。老母年七十有六。菽水無缺。遙知關念。並以附聞。近刻呈正。端望好音。仍付馬弁家郵爲便也。周芑穀久無音問。便中及之。

答朱小晉同年書

自僕邀恩而歸。八年於茲。去大君子教益日遠矣。每展讀贈言及論學諸說。又如接面也。惟翹望足下事業有進。學問有加。吾晉本朝首科第一人。斯可不愧。但長安道上。同志幾人。講肄安在。僕無從而問之。總因家居養母。不敢致訊京華。凡舊時知契。未知動靜何如耳。頃者下問山中。捧函色喜。復注念慈闈。解衣衣之。感可知也。老母今年七十有八。飲食極少。步履甚艱。出入用四輪小椅。兒孫推挽而行。幸託庇無恙。謹錄庭闈紀事一冊報聞。僕菽水之餘。惟以風俗教化爲事。少答先皇帝浩蕩之恩。以成州大夫敦請之雅。卒亦寡效。並錄願學堂講書一冊報聞。至於所奉教者。則孫退谷白東谷刁蒙吉三先生。皆林下也。而當道不與焉。所認著者。則日知錄力行錄。儒言錄。大學管窺。問途集諸書。皆理學也。而詩文不與焉。編摩數載。概未成帙。統俟他日請正。僕行年五十。深悔浪過光陰。自遠聖域。卽如吾鄉薛文清一派。曹真子先生傳於前。辛復元先生傳於後。此後當歸何人。雖有一二向上之資。夾雜二氏。反足爲害。僕不能不以此事屬足下矣。萬乞猛力擔承。實心體認。一鄉中之一家一派。當從復元先生溯而上之。直與文清同接席。庶可完得此日此生。若高談性命名儒而墨行。僕竊不取也。高明以爲何如。憶贈言集中錄足下從腐字做成從老實踏腳之二款。願先行其言。僕更不敢不勉焉。不宣。

答汪茗文戶曹書

憶在都門時。先生知僕有母且老。情可以歸。歸而母可無恙也。遂戴恩而歸。依依膝下者七閱月。向來繫

念遊子之鬱懷。漸爲釋去。而果無恙矣。生我者父母。成我者君父。何其幸乎。僕每北向祝萬壽。未嘗不念先生知我之深也。先生於僕交未久。然教之愛之。有不啻鍼芥之合者。臨歧握手殷勤。期以詩文報左右。第身在慈闈。足不出戶庭。半步志同道合。未得良朋。而倡和缺然。里下比歲不豐。輸納最急。仰事俯育。鮮能盡周。一家之樂。非所樂也。而歌咏廢。欲求一詩一文。以爲艱難矣。來教所云。自吐其言。而或有所不屑。豈先生之知我哉。所不敢負先生教愛之雅者。謬謂居家居鄉。當以父母君父之心爲心。入則稱說古昔嘉言懿行。令家人環而聽之。堂上老親。亦少開顏色。出則從州大夫講說鄉約。明朝廷之教化。啓邊塞之愚蒙。提出良心。風俗少變。差可爲先生道者。恃有此耳。僕素不習無益詩文。當檢庸齋紀言。繕寫求正。另圖郵致也。佳序一字一情。所謂規以道而玉於成。非耶。古人之誼。載之家乘矣。岍茗湖筆。出自先生之惠。安有不義者。謹下拜。慈闈稍健於昔。然鬢上霜雪漸多矣。承注念。敢以慰惓惓。先生行誼日高。文章日進。惟我山中人。不敢一刺入長安。欲奉教而無由也。幸知己垂察。嗣勿金玉其音。感荷感荷。

答畢亮四同年書

足下半生苦人。纔得老蚌雙珠之喜。復與孤絃輒斷之悲。遺茲呱呱。誰與之乳。卽此一節。情何以堪。重以女兄含冤而死。不獲瞑目。已付之無可奈何。反致清白縉紳。寢食不定。行道之人。聞之寒心矣。所望者足下大德應事。化有爲無。尼山家法。微服過宋。亦何愧哉。更度其人之碌碌。無足重輕。聊堪自解。日與鄉里細人雜處風波中。傷體不小。且令嗣弱質也。疑慮紘然。輟耕廢學。無一可者。昔人問止謗法。曰勿辨。今日

之謂歟。承念先慈墓上碑。今秋採石不得。期在來歲清明時矣。行後半年。往往夢見顏色。談心論道。覺而記之。以志不忘。誠兒篝燈舉筆。必數問高平先生消息也。惟是高誼惓惓。再臨絕塞。竊恐先慈靈爽。有所未安。况半百之年。風雪寒暑與風波等。幸自愛焉。頃遵來命。亦不敢專人奉唁。姑遲之耳。不孝兩臂無恙。舉手尙艱。日坐牀頭。拈弄八股生活。開小兒愚昧。亦一忘病法也。每朔望則攜兒俯伏墓道。一觀封樹已爾。家兄姪兒暨諸親友輩。各囑筆代候。

### 答畢亮四同年書

滿望秋闈得令副捷書爲快。而不意全晉之不勝也。一拔貢未足酬義方。然亦需之時命可耳。讀大著兩篇。經術經世。天下文章。莫大乎是。安得獻之九重。爲昭代石畫耶。近有纂輯一統志之舉。此本朝文獻也。晉省全志。非藉鉅筆。無足傳信。况東谷先生老成典型。史館夙望。兩君子肯爲全晉班馬。大典藉光。何如。何如。僕氣弱而年衰。自揣疎淺。不克勝厥任。旣任矣。死生利害。固不暇計。計家居十四年。讖見迂闊。於國事罔濟。又安得與長者促膝談天下事哉。丙戌老同年。官都下者僅十餘人。他皆英少了。不相識。可謂孤立矣。幸堯舜之主在上。事事以百姓爲念。天下之福也。惜臣子贊勸之力。尙有未盡焉。入都兩月。他無足道者。令嗣歸里。僕旅况自能悉言之。不復贅。

### 寄畢亮四同年書

從鄭進士每訊起居。頗知清勝。忽聞令嗣鼓盆之變。中饋少一賢婦。家庭增一苦况。知己其何以堪。幸善

自寬遣。卽令嗣亦勿過爲抑鬱也。僕一歲三遷。濫叨知遇。愧難報稱。夙夜疚心。薦賢旣非諫官之職。除奸又有風聞之禁。卽一二條議。亦格於部覆而不行。此僕之所以抱愧也。今且儼然京兆矣。求如古之雋不疑。趙廣漢輩。一寬一嚴。未知孰是。而况孝肅其人哉。高明必有以益我。近見士大夫率以感應篇勸世。自是好念頭。僕謂以禍福勸。不若以名節勸之爲切。方今吏治多雜。何不集古儒吏廉吏才吏勞吏四種爲一刻。使作吏者之知所自擇。以求進於古人之一班耶。請示其指。曩聞泉石無恙。可以棲遲。然而淡泊甯靜中。自有遠猷大略。爲聖主抒南顧之憂。長者素心忠愛。能無有動於中乎。白東谷先生三哲學者也。頃聞長逝。深爲吾道悼。近詩二紙。附求教正。僕近况如昔。然而兩鬢多霜矣。小兒讀書無師。願就提命。孺子可教否。僕不敢知也。竝請何如。

與秦尾僊學使書

日久不親叔度。渴想正深。忽聞提學之命。遂擬作絕交書矣。伏思賢昆仲負海內文望。而品足副之。洵當世之所重者。足下入秦伊邇。正吾道伸眉吐氣時也。僕敢無一言以相贈乎。近日士風漸壞。文運不昌。病在有情面而無文章。有文章而無德行。拂天下大公之望。抑孔門首重之科。請託公行。廉恥道喪。俾人才所從出之地。旣無真秀才。安得有真舉人。真進士耶。僕嘗拙眼觀人生平。如見以情面進身者。必重情面。以文章進身者。必重文章。以德行立身者。必重德行。如燈之取影。毫髮不爽也。足下之才之學之品。豈復慮此者。但功令森嚴。身名爲重。內外情面。概宜謝絕。然後以處女之自愛者愛身。以嚴父之教子者教士。



士風文運實嘉賴之固高明之所素優而又僕之所爲翹望也。至僕經鄙無似知已諒我匪一日矣。此後有以僕片紙隻字達於聞見者必小人之假冒也。幸嚴察之仍置諸法庶幾相與有成耳。古詩述之扇頭以常白水何如。

### 與胡東甌同年書

小壻詣府起居每每取擾心殊未安拙論辱指示敬佩之矣。別教養生家之合於吾儒者五則且謂習聞素見是矣。然正恐聞見多而行不逮耳。請以第一則商之。聖賢之論言行者原非教人少言語。蓋教人力行也。看以我爲隱及天何言哉二章盡之矣。惟聖人不必慎言語直從當身語嘿動靜說到上天時物行生窮源悉委引人實地不啻諄切再觀鄉黨之恂恂宗廟朝廷之便便上大夫之聞聞下大夫之侃侃皆慎也。易所謂養正則吉也。若謂聖人之慎言語祇如世人之少說話則失其所以教人之意矣。彼養生家之慎言語似謂養氣耳。夫氣未有不從言語中養之者。孟子好辯正其善養浩然之氣也不言性善則邪說興不言仁義則功利熾吾儒之氣安得充塞天地乎。且孟子之功不在禹下將取其慎言語而云然乎。是乎否乎。世儒之論久伏疑根矣。幸高明發我覆焉。至於參同契悟真篇雖不敢與聞亦有一節奉請者。參同契果朱子註乎。或註於二十四五歲汎汎釋老之時乎。若晚年註此其於慎言語之義何居。並希開牖贈言四冊。或敍或評惟足下命不敢以不急之書有妨靜攝恐非相愛意也。歲前所領恩軸到蔚老母能扶杖叩闕展祠成禮一門之幸敬以制書奉覽。

答王近微同年書

數載家居。與長者通音問。寄唱和者。僅一至再耳。仰知貴恙方瘳。杜門靜攝。泛泛詩牘之類。毫無裨益。徒費應酬。非病中所宜者。歲前稍聞清勝。纔敢以紀言一書。就正於有道。如握手促膝。款款說家常話。是僕之情懷也。且以平日所言者。告之於知己。儻異日行不逮言。得以執而督我。是又僕之鞭策也。辱不鄙而賜之教。採擇之中。加以規勉。貽以篇章。讀之嘆服。僕初意謂不可以告天。不可以告人者。弗言弗行也。先生乃謂不可以養親者。弗言弗行也。道在是矣。敢不書紳哉。理學一途。世人驚詫者衆。而邊地尤甚。將謂存天理。去人欲。爲必不可到之一境。高明省心之法。料不過省此而已。從前孟浪。乃旣逝之波。追想何益。惟思儒之所以異禪者。何在。譬如今日生此身。今日合肩此擔。只講得天理人欲。了了分明。一往行去。不復退轉。一日終身。死而後已。此真吾輩下手處。惟深造而自得之。案頭有四書一部最好。試看克己寡過。求放心。俱非空言懺悔者。猶憶先生試錄序云。背棄傳註。參用釋老者。擯之。慎勿忘此言之出也。因先生誨誘真切。敢竭愚誠。以副明問。完昔年鼎立宣雲之一語足矣。平城胸中透徹。惜其以詩文爲盡境。應州近悟二氏之非。奮然歸儒矣。代州有馮訥生。識見高。議論正。僕亦與有砥礪焉。因先生月旦而及之。紀言五册收入。訖古人之書。知先生博覽多矣。檢得時賢著書八種。附使呈覽。有便寄回。率復。

答王近微同年書

足下因病辭官。十有九載。林泉之致。半屬沈疴。僕所素知也。沙城一晤。且望見顏色。不似昔年鐵漢子。已

不敢再望出山矣。年來四方多事。民生不安。仰聖主之焦勞。愧臣子之尸素。既乏籌兵之略。又無裕餉之方。蚤夜思維。負君父隆恩多矣。竊念忠義之性。誰獨無之。乃往往驕兵悍將。奸宄蚩愚。搖惑而不卽定。須得真才真品。斯可以收人心而濟時艱。况桑梓綢繆。撫綏宜蚤。尤僕之深憂。而過計者也。從來以人事君者。大臣之誼。僕雖庸碌。豈敢蔽賢。因而妄藉餘光。自盡微分。不暇計及清恙之全愈與否也。頃拜翰教。復接令弟面談。始知夙病尙未盡瘳。捧檄猶有難色。讀至力不從心。寢食皆廢。數語。僕之此舉。於朝廷不敢言功。於知己不能辭咎矣。奈何奈何。但足下心切報國。信於平生。今出處所關。必有定見。僕既以入告。夫復何言。惟在高明自爲審度。求所以上不負天子。下不負所學。則僕之至願也。僕行年五十有九。當此君憂臣辱之際。勉竭駑力。未敢告勞。兩鬢雪霜。不堪自對。統煩令弟口道之。冗筆率復。不莊不盡。

寄解法周同年書

長者南行之日。未獲面別。終抱一歉。嗣此止聞途中平安耳。而抵粵消息無聞也。今春令嗣過蔚。頗知近况。萬里之外。寄訊爲難。適因紀綱南去。附候起居。竊有三進焉。南北風氣不同。滋補藥餌。不可不有。衣服飲食。不可不節。此保身之道也。艱難困苦。遭遇不齊。自古迄今。不知凡幾。返諸屋漏。原無愧怍。只以義命自安。可省多少煩惱。此安心之道也。平日讀書。率爲虛名所誤。今日身家。俱非所有。惟聖賢道理。老老實實。昭揭天壤。正好尋求。儻有所得。著成一書。必有傳之者。興至則吟咏遣懷。奇山奇水。奇人奇物。收入奚囊。此立言之道也。至於朝廷雨露之恩。祖宗墳墓之望。皆事之不可必得。而得之終必有日者。仍聽之天。

而已。高明自有達觀。不待愚言之贅也。前歲靈邱未候。陞任羅定。僕曾寄一書。並小詩寄候。未知達否。吾鄉仕嶺南者。一時多君子。推食解衣。或無饑寒憂乎。良友佳士。所得幾何人。熊夢之叶。竟何如也。統乞示我爲慰。寒舍平安。老母數年多病。今幸無恙。僕菽水之餘。大約以修輯儒書爲學問。以移風易俗爲事業。家居近况。盡乎此矣。若詩酒田園。非所計及也。敢爲知己言之。聊慰懷念耳。路長紙短。諸不具悉。

答王蓼航同年書

與足下不相聞問者。十有七年矣。蔚僻地也。從無過客仕宦。可託雙魚。憶二年前。從白登友人徐子處。寄來長歌一紙。僕快讀數過。竊喜別後學力之深。詩律之細。追蹤少陵。舍此其誰。隨黏之授經堂壁。時時珍玩。竟不知詩之所自來也。去歲臘月廿八日。周計百貳府下車左衛。致書蔚羅。知足下見訊雅意。僕與周君交非有素。僅託賤名。並刻箋致候。猶恐浮沈。不意推愛至再。尺牘大函。復走山中。宛宛見故人談舊事也。吾同榜四百人。今復有幾。同館五十人。今復有幾。仕籍家食之間。曾以道德學問相與相成者。今復有幾。言之可爲三嘆。况知己山居養親。與僕同。不通音問於都門。與僕又同。獨詩格精進。僕遠遜不能及。其所學。又不知僕之相及萬一否也。聞蘇門山中高賢在焉。僕所企望而不得。一至門牆者。鍾元先生一人耳。數年來。足下有何講論。有何著述。身親函丈。較千里而私淑者。什伯也。幸一一教我。大集有付梓者。並望指南。若僕自菽水而外。惟講明六諭鄉約。與里中父老子弟。改過遷善而已。昔蘧伯玉行年五十而知四十九年之非。吾輩正其時也。足下日課工夫。凡可爲我砥礪者。請悉爲剖示。丙戌榜中。若無三五人。

以理學經濟名世者。缺事亦愧事也。貴鄉前有二程。後有二呂。高明當何以處此。誦雙烈詩。誠有裨於風教。彙集不日付梓。拙詩一冊。希長者逐句刪削。卽弁數語以志勿忘。諒不我吝也。話言絮聒。幸垂察。

### 答馮訥生及門書

門下天資高妙。平日敬服。頃接翰示。具見向學真誠。句句踏到實地。所詣自不敢量矣。細讀來論。以求放心爲本。以勉強力行爲先。以有恆爲要。是三是一。但入手把柄。用力淺深。隨人自得耳。如行路然。認得程途不差。究竟走到是處。若化名心。窒忿欲云云。當於存心公私辨之。人倫日用間。本無新奇之言。矯激之行。將從何處求名。然而實行之必有名者。猶芳草之必有香。非求香也。香亦不能自掩耳。故君子疾沒世而名不稱。不然。逃名絕世。是禪非儒矣。至於怒與欲。尤不可少。一怒而天下安則公。一怒而諸侯懼則私。欲立欲達則公。欲富欲貴則私。正門下所謂止爭天理人欲者也。純天理者爲聖。守天理而閑人欲者爲賢。此卽安勉之分耳。聖人是有體有用底人。然道理只是一貫。曾子守約。見與忠恕。故唯這箇。顏子復禮。見爲文禮。故嘆這箇。且當日卓立光景。明白易見了無疑義。人自今日懸想孔子道理。一言一動。實實落落。如在眼前。顏子親承教澤。如愚足發。故所見如此。註謂日用行事是也。日用行事。無一非性與天道之端倪也。此外無道矣。亦無學矣。極和趨向堅定。力圖體用之學。再進一言。先求改過。僕不敏。願互相切磋焉。時家祠經始。方有事於土木。不及詳答。再白。

### 答馮訥生及門書

來書謂從前工夫。尙有未是。乃學然後知不足也。由博返約。豈廢詮解記誦。但詮解記誦。爲實非爲文。爲行非爲知耳。以門下向學之專。任道之勇。何求不得。僕曩所謂讀書明大義者。正因年過壯盛。不能讀書。一味勉強而行。改過遷善。或未晚也。卽有時讀書。亦從自心自性。驗之古人合否而已。敢實證於知己者。如此。昨書內有知而不能一語。待門下細參之。頃讀制義云。孝與忠。夫人而知之。事親事君。宜夫人而能之。二語畢矣。又何多言。愚正謂無不知愛。無不知敬。知卽是能。此孩提稍長事也。能竭其力。能致其身。能卽是知。此成人以後事也。其中大小精粗之故。非閱歷之深。體驗之熟。未可盡言耳。高明當自得之也。大著切願領略。幾希錄之名。目中未見。而意欲相成。點擯無常。門下存其意可也。原稿附回。再承慰問。感感。老母在堂。何敢爲西河之慟。平日所學。儘可勉持。但言行有失。責在朋友。幸勿吝焉。

與馮訥生及門書

前讀來書。先行求放心二解。率皆探本之論。其於學也。庶幾矣。昔人云。學貴疑。大疑則大進。小疑則小進。僕尤不能無疑焉。門下解先行。是教以慎言之道。非教以立言之道。誠然。但云聖賢不得已。而有言。非有意立言。此非僕所知也。竊謂聖賢之言。如人之飲食夢寐。如物之踟躕飛鳴。如天之風雨露雷。日星雲漢。皆自然而然。何嘗有意立言。惟近代詩文之家。分門別類。極巧窮工。每刻一集。動至三二十冊。不知於立言之道。果何如也。僕嘗反己。自愧犯此病多矣。若夫聖賢之言。皆聖賢之行也。譬如閱歷程途。其中山川險夷。一一舉以告人。使人不迷於所往。雖謂之有意立言。亦無不可。其不得已者。又安在耶。門下又解求

放心。謂心神物。豈能求來。更不再放。豈同雞犬可以籠致云云。此更非僕所知也。竊謂雞犬至蠢也。人心至神至靈也。既知一念之邪矣。而一念又續之。既知一事之錯矣。而一事又繼之。推之念念事事。概可知也。豈復可言學問。若云時時放。時時求是無他者。而有他。已矣者。而不已也。立言宗旨。果如是乎。且孔子言一日克己復禮。天下歸仁。言成功之一日乎。抑教之日日克日日復乎。克復與求放心。有何異乎。勿其非禮。則禮復矣。既復而仍有不復之時乎。知其不仁不義。則放心求矣。既求而仍有放之時乎。夫放而弗知求者。衆也。及其求之而又放之。以學道問道之心。亦有時而不仁不義。以至神至靈之心。亦有時而若愚若頑。欲其終食無違。造次顛沛。必於是。難矣。門下所謂內外精粗中和慎獨俱在此者。必不得之數也。以愚論之。世儒之求放心者。皆攝念之說。非求放心之說。本章仁人心義人路。專爲求仁義而言。孟子七篇大本領。正千古學問大根源。蓋心之放於不仁不義者。確乎從事物求之也。不然。泛泛求心。佛氏未嘗無之。居仁由義。恐不爾也。如謂去聲色勢利。佛老一求已畢云云。乃僕前說未悉。門下之疑。有自來也。請一再申之。譬有人焉。今日知聲色勢利佛老之非。明日又見聲色勢利佛老之是。倏收倏放。反復不常。雖操莽之心。不是過也。門下願以堯舜微危擬之。豈人心去而道心存。亦有忽存忽去時乎。類擇一集。雖言不能盡。亦可爲本章羽翼耳。至謂心在腔子裏。察公私義利之辨。此門下合乎朱註志氣清明義理昭著之說也。謂心求來更不再放。則僕合乎程註下學而上達之說也。明辨之後。尙俟豁然貫通焉。故不覺媿媿言之。門下何以釋僕之疑乎。二說與祁州刁蒙古商量未定。因檢諸稿奉覽。幸一參訂之。爲慰。餘不悉。

答馮訥生及門書

生日一節。世俗相沿久矣。論理此日爲報親之日。論情則此日爲娛親之日。故膝下稱觴。情理俱合也。若親尙在而自受觴祝。何以答蓐草之艱。子未成而自開壽筵。伊誰致斑斕之樂。此情理之難通者。僕十餘年來。在都在里。每逢初度。淡食齋心。自晚輩門人以至家僕官役。惟令設座中堂。拜我老母。僕並不受人一拜。遂定爲本家之例。載在家乘矣。去年州守某公及諸官長。有破例之一舉。辭至再四。竟不從。迄今回視十年。言行不相顧。奈何奈何。今年仍存舊例。預謝親知。卽指爲過矯。不遑恤也。况僕不德不孝。近有次兒及外甥痘殤。致貽老母憂。春秋高矣。其何以堪。雖家室之人。抑情寬慰。談笑如常。欲得歡心。轉增煩悶。設帨之辰。在卽。舉觴之禮。不行。仰奉慈命。不敢不遵。區區馬齒。又何言哉。遠承注念。祇領佳篇。情見乎詞矣。若僕行之當。則廣其傳以砭俗。卽行之未當。亦可諒其心以相成也。至於一歲之中。求其不虛此生者。幾何日。此又難與他人道耳。幸知己念之。我輩終日講箇行字。此等固行之易。忽處亦行之易。制處也。不然。隨俗而流。以無害於義爲口實。非所共勉矣。

與馮訥生及門書

大庭廣衆。孰無正大之容。處順居常。孰無節義之語。聲色交於前。利欲迫於後。人品見於是矣。然辛子亦就當日之人言之也。若今日見一正大之容。必指爲迂闊。聞一節義之語。必笑其狂妄。久之而大庭亦聲色。居常皆利欲。恬然而不知怪矣。如門下所云。立說以祈身後之名。當今之譽者。今乃並其名譽而棄之。



隨波逐流。安問人品。夜光芝草。世猶見之。獨正大之容。節義之語。不少概見也。士君子其有憂患乎。門下閱世已深。維世必切。凡遇正大之容。節義之語。卽珍如夜光芝草。因其人而玉成之。幸勿忽焉。

答成我存及門書

不佞遵旨扶病攜兩幼子。侍老母入都。在仲秋之廿二日也。前荷相念之雅。裁有手書。附便南去。想入目中。邇者慈闈夙恙。仗庇稍清。獨不佞孱弱之軀。衰憊益甚。猶作牀頭僵臥人。且恐無當於清班。而徒依依輦轂之下也。行樂讀書。選古今嘉言錄十卷。時用自警。外無他事矣。芳訊再來。知循理守法安命六字箴。門下不忍鄙而置之也。幸矣。所云閩中師旅饑饉。繪圖難盡。不佞謂此圖繪之紙上。不如繪之心中。師旅所在。朝廷之封疆也。饑饉相聞。朝廷之赤子也。兵餉作何籌畫。蠲賑作何舉行。濟得一分。救得一民。於職克盡。卽於理無虧。謂非循理不可也。門下不嘗有見得到且著實行去之言乎。行之在今日矣。至於行善作好事等語。加惴惴二字。小心守法。正在此處。善之可以直行者。天下有幾事哉。必須三令五申。婉引曲喻。得以行吾之直而已。平日持敬爲公二義。足下大本領已具於胸中。不佞夫復何言者。若夫憂勞危苦。正是錯節盤根真種子。幾見古人功業。從安樂而成哉。以門下之淡泊甯靜。受此簡書。我若不憂勞危苦。而舉以讓人。其何以展生平。答知遇乎。命數使然。言之誠是。可謂善於安命耳。此後之身與名。天自安排。何暇問耶。惟望珍愛。

答成我存及門書

接得來書。及所寄李延平廖槎溪兩先生遺集。知門下按部之餘。此心未嘗一日不與先儒相晤對也。理學淵源。千載如新。當世之鉅公偉人。豈無一二師友步武兩先生者乎。如其有之。洵可樂矣。比讀謁文廟誓詞。大義小心。懷乎冰玉。趙清獻焚香夜告。門下其後身耶。吾輩爲學。只是去得欲斷。自然見得理真。所示暗室警醒。及師戒。誠屬吏諸語。皆成己成物。人我一體之心。父之教子。師之訓弟。不是過矣。令申於前。而法繩於後。貪風其少息。廉吏其可爲乎。所謂簡書之靈也。所云行正未足恃。爲善尙多危。不過就人情言之耳。烏足以盡天意哉。近日北闈科場一案。受禍極慘。而人心大快。未聞有一行正爲善之人。陷入法網者。前者不佞亦曾受鉤黨之謗。意在誣而殺之也。願聖明在上。公論在朝。奇冤立雪矣。昨給假歸里。大病幾死。請告有例。而部覆無例。及勉扶入都。而長兒忽殤。豈亦誣我者所爲耶。且如李琳枝聲聲載道。而大恩終邀。又按差中之顯然可見者。總之恃天甚穩。愈危愈慎。得如翁直指渭公一出。至今宣雲童叟。手額祝翁氏。世世爲御史。不佞所深信於門下者。當如是耳。老母因都門水土不宜。今年仲夏。令荆妻奉歸家鄉矣。不佞閉門檢書。不晤一客。閒中有嘉言錄之撰。未能卽就。蓋以今人之爲嘉言者。一時難於採輯也。容奉寄梓行。何如。曩過湯子問病。曾見寒暄之訊。甫一二日。而湯子辭世矣。安能呼天而問之。極知關念。並附一聞。

答成我存及門書

去冬讀見別之訊。並悅心錄一冊。門下之境遇學問。大段可知。偶成詩律。未得奉答爲悵。聞關南北。實不

能忘。非世俗寒溫可了也。每見佳著。有善於處貧妙於卻病之方。安得窘塞如此。或由勉而利之難耶。抑入見道德出見紛華之易耶。門下素有定力。諒不他移。當從根株求之則得矣。不佞於境遇逆難易之間。到處只見成就。故勉強受之。久而驗之。夢寐漸覺相安。又再行一事。要把自己平日言語作證。卽或事艱力窘時。輒自責曰。誰教爾說出來。而今卻退轉不得矣。此不佞近日切要兩關。與門下商量處置。凡立言多而行不逮者。或有之矣。蓋自信焉。承念者。老母今年七十有五。衰病日見。非拄杖扶持。不能行半步。常坐四輪小椅。出庭院一遊而已。小兒已讀論語半部。歲前又育男。爲家兄抱去繼嗣矣。近况聊以附聞。不佞讀書之功。大約在儒言一集。字字推求。動見世儒辨難多而躬行少。擇其闡發聖道言行相符者錄之。漸成書矣。目次中尙有缺本傳及語錄者。各註明白。煩門下留心購求之。有便寄來爲荷。前詩並奉一覽。悅心錄再惠二冊贈知交也。

### 與王允大及門書

昨借看邸鈔。知門下奉有學政之命。深爲色喜。憶門下幼而受業者。與公先生也。長而受知者。不佞也。文章固所優爲矣。然其勝任而愉快者。不第文章已也。不佞以道義交門下。幾二十年。稔知枉己而徇人。素性所不爲。向來一蔬一醴。各相與於世情之外。衡文千古事也。願可容其枉且徇乎。况懷懷簡書。生平一日。與其得罪於寒儒素士也。寧得罪於卿大夫。昔日與公先生之校三晉士。芳規具在焉。山高水長。曷日忘之。且閉門下善事慈闈。色養備至。奉太安人之教。惟謹。太安人亦未嘗不愛其子。如與公先生及不佞。

者也不佞文章遠不逮與公而澹泊之志竊有合焉者十四年來並無一事貽高堂之憂惟此小心耳更不煩爲門下贅矣但思秦地之去敵鄉不甚相遠恐習知門下與不佞有舊招搖騙詐之徒壞我名節雖門下深知不佞從無竿牘之事亦不得不嚴防而密察也至於片紙隻字彼此兩絕若門下有起居於不佞者亦投之水火不敢開惟自愛並愛不佞爲望曩所勉者循理守法安命六字箴也今所贈者公明二字箴也儼異日三秦之地有理學名儒其人者建大功立大業必溯淵源而論之則不佞之藉光實多矣惟理學遺集敢煩購求者一爲呂涇野先生一爲馮少墟先生也二公著書甚多幸留意焉前惠紬菓捧獻家慈謝謝

答王允大及門書

不佞行年五十有六矣去年九月服闋後小兒遊泮完婚蓋十五歲也次小兒爲家兄承嗣餘尙幼稚此家庭事也今歲起復固不敢忘世祖高厚之恩因有小恙遂欲終焉而已不意召旨兩下誼當赴闕叨蒙聖眷擢用西臺迂腐書生恐克副言責甚難惟竭盡此心耳此出山事也兩月以來仰見天子勵精圖治聰明寬大無事不念及百姓而臣子之心願身家不顧民命尙奢美不尙儉約求所以仰副宸衷者又甚難不佞雖不才竊願與士大夫共勉之此入都事也每年用度約需三百六十兩房租地租計得百二十兩俸薪計得八十兩妻兄李恆嶽每年許助一百兩共三百兩截長補短不隨公分不請客赴席每日一兩足矣此度日事也他復何求哉聞門下偶患臂毒今平矣太夫人健飯可喜諸子讀書可嘉門下念及

淵源更當盡心職業。藉光尤多。僕於閏七月朔日入都。茲承注愛。並念小兒讀書。感謝並候。

### 答孫壽周及門書

前者寄訊丹陽。因貴郡爲名醫藪。可代老母求一良方也。不謂買舟在先。郵筒未及。頃者骨肉關切。復從都門覓方於蕭封公。其人老成君子。不佞向所敬服者也。觀其發論鑿鑿。對症可知。又勞門下精選藥品。遣价遠來。炮製封函。用心曲至。不佞爲子而不知醫。不孝也。門下有以益我矣。遂進一介。叩膝下代致遠意。奉慈命稱謝至再焉。不佞適自鄉中與東甌胡氏修輯荒譜歸家。越二日。值先祠秋祭。是日執事之勞。盛价與焉。不知門下聞之。快心當何如也。過此秋氣更爽。卽照方投劑。奏效可卜。小兒讀論語俱完。卜於中秋前三日。就外傳承惠衣帽。以成人望之。雅誼良厚。姪子在長兄宅。亦能語能步矣。附聞。長安道上。候缺未補之時。正好讀書。大約理學經濟。開卷益人。况門下志向不凡。同門而外。可與馮訥生互相切磋。吾道其有幸乎。諸友近况。大概已悉。袁丹叔每有音問到蔚。周芑穀甚遠。便中煩一訊之。勉其山中讀書也。不盡。

### 寄孫壽周及門書

前得芳訊。知門下有提督蜀學之任。不佞喜而自慰者三。新闢之土。文教方興。賴門下有品有學。拔孤寒而作士氣。蜀之幸也。素性淡泊。與地相宜。人亦諒無責望。又門下之幸也。衡文之官。近屬濫觴。辱朝廷而羞當世者多矣。能以公且明爲此官重。且不令讀書生童唾罵及之。飲水思源。知不佞取友必端也。不佞

之幸。又爲何如哉。自今以後。與門下斷絕書函。以俟三年而復常也。幸勉旃自愛。

答易子然及門書

盛价遠致芳訊。問慰山中。不佞見之。宛如接面。益知門下雅誼纏綿。如此其重也。閱黔省題名。敬竣王事。果得淵源之學。不僅以八股稱最者。門下豈欺我哉。憶敵鄉乙酉科。亦以兵火之後。風教初開。兩主司公而且明。得人爲前後諸科之冠。朱小晉其榜元也。王君承禎。又安知不頡頏耶。喜可知也。昨寒門蚤沾綸命。榮寵逾涯。所不敢忘先帝之深恩者。從狂波烈燄中。得扶持老母。以有今日。此擬表一通。猶冀仰答在天之靈於萬一。儻非先帝明如日月。則要人刀俎已加之久矣。願諸友立身行道。更出不佞之上。故諄諄耳。門下勉勵有加。吾心慰矣。夫復何言。惟是注念萱闈。藥以丹砂。衣以絲帛。不佞進一介叩膝下。且代致遠意。奉慈命稱謝者。再。先是不佞與東甌胡氏纂輯荒譜。自鄉中歸。越二日。值先祠秋祭。是日執事之勞。盛价與焉。門下聞之。快心當何如也。聞厚菴先生予假南旋。攜譚氏子振宗歸哺漢上。夫詔來之有後也。天生之厚菴成之。片言何足德先生。但不佞與先生同學聖人之道。以先生班在侍從。向不敢析一疑。辨一惑。然而飲食夢寐。未嘗不依依講席間也。今漢南塞北。起居更難。此後明道於鄉。尤有深望。頻行頌爲致聲。前寄洄詞一書。至今未返。恐囊中又少一物。並希白之爲望。更有言者。清暑如冰。勉修職業。分光不淺。不佞菽水有暇。尙以移風易俗爲事。吾輩無論在朝在野。直一體視之耳。孫退谷先生所學甚正。是不佞奉爲典型者。泉石無嫌。問答不斷。門下日親函丈。近而求之。必有所得也。先生老矣。時不可失。敢並及

焉。

寄袁丹叔太守書

別後憶新政。可次第就緒耶。計典在卽。一切賢否。開報倍加慎重。以副朝廷黜幽陟明之至意。又不俟愚言之贅矣。足下素性愛人才。重學問。生所稔知也。敝鄉絳州有党冰壑先生名成者。隱居闔修。不求聞達。其真正理學。在吳康齋陳白沙之上。曩來官此郡者。勞勞簿書中。無暇物色之。且不知此地有先生也。足下知之否。知之卽當式其廬。叩其所學。敦請講學於晉山書院。倡明吾道。教化地方。與鄉之士大夫相與。以有成。豈不美哉。如果真學真品。不愧山林隱逸之選。卽繼李中孚先生而力舉之。以見朝廷求賢而賢出。勿以浙省爲忌也。是在足下爲之耳。若不佞聞其人。讀其書。則敬服久矣。王敷五太史請假送親歸里。因便附言。別無他及。

答徐雲門貢士書

小春惠佳句。策勉之意厚矣。厚矣。雖未裁尺一爲謝。然已錄之佩言集中。不作尋常壽詩觀。憶庚子仲春之夢。當因氣餒而成。僕經學本疏。故魂夢猶歉。未能講出一貫之旨也。如秀才夢督學較試。驚怖而醒。終不成章。正此類耳。曩因仁兄翻閱五經。敢有此請。若大解云云。何其門面耶。日知嘉言錄不妨詳慎。訥生之論是也。但宋儒以後。純粹之言。幾成空谷之音。求之時輩。又不當過苛矣。况集中原非道學名目。其人不過善人信人之流。於詩文之外。利祿之餘。有此一種嘉話。醒人心脾。豁人耳目。未必非熱鬧場中清涼

散也。謂在都諸公有嫌可避則可。無言可採則不可。暫停剗劘再商之。僕嘗屈指同朝共事。真狂真狷。不下數人。皆僕萬不能及者。願可輕量天下士哉。佩言集非問世之書。示我後人足矣。儻暇中爲數言序之。願從質也。願學堂講書。誠如高見。此舉成已成物。固非所能。獨是桑梓之士。溺於八股套中。竟不知聖賢書爲何而作。僕若借州大夫之意以共明之。卽云掠名亦未嘗不美。第恐無益於人而獨損於己。欲何爲乎。此亦頗費躊躇之事也。雞黍一約。暮春新秋。無所不可。仁兄家庭間。亦非灑灑無慮時也。聞命矣。讀送馮詩十二首。公舉也。自風美可觀。若我輩自爲送詩。宜更真切耳。但證一冊與訥生相質者。希從實答示。如座上挹清談也。僕於臘月廿八日。又舉一子。因家兄缺嗣。奉老母命告諸先祠。彌月時爲家兄後。慈心慰矣。仁兄關切等於骨肉。敢以相聞。餘不贅及。

與徐雲門貢士書

前月之信。寄至西淇。知尊恙晚年之常。確非火症。可無藥也。慰慰。老母承注念更感。大抵今年多病。迥異去年。膝下承歡。難盡萬一。當何以益我。庸齋二冊。又煩指示。費心過多。然所以告我朋友之願。此一年可了矣。佩言一序。後改者佳。但未用曹植一段。未免因老瞞刺目。再容面商。昨讀近咏。備見秋岳公虛以下交。不介而合如此。此公海內負重望。一旦爲塞上福星。林間臭味。喜當何如。且爲吾鄉培養元氣。大有作用。觀風采詩。特其一節耳。頃者晤敝州鄭侯云。闔鎮屬僚。於其生日。有徵文爲祝之舉。公也非私也。禮也非情也。或亦功令所不禁者。屬僕爲文。以僕頗悉生平。且都門相知有素。原不當辭。其如僕之不文何。



仁兄知僕久矣。凡壽賀之類。從未涉筆。不容不辭。此鄭侯所諒也。繼以轉求相託。意在平城矣。此則不容代辭者。况仁兄與曹公初交如夙契。而下車以來之實心實政。目擊最確。口道尤真。儻大筆筆之議論。出於草澤之間。渾是輿情。豈云阿好。以視假借縉紳銜名者。天淵矣。曹公知足下之人。誦其詩而猶未讀其文也。會當三絕。又何吝焉。若從前履歷。僕所知者。奉採及之。惟祈台照。

答申臯盟書

疏起居久矣。頻年老母抱病。日在湯藥中。塞上無醫。粗習方書。幸無大誤。垂危而安者。慈德所致也。然僕則諸事俱廢矣。所歉者。三兄館選而無一言。二兄秋捷而又無一言。豈但老兄寒溫數語哉。每與鄉間親友話及潭府忠孝之篤。友愛之真。人品之高。學問之正。科第之盛。詩文之雅。卓乎備矣。惟願清白家門。兄弟若弟。互相師友。兢兢然善守而光大之。居鄉勿履公庭。居官勿交匪類。奉正人君子。爲師爲友。本天理良心。愛國愛君。文章旣傳。理學漸著。要使忠臣之裔。大儒出焉。是僕區區之所企望者也。若以緘言致賀。深愧不能矣。今年四月。因老母大病之後。八袞之辰。膝前菽水。無以承歡。乞言一紙。纔入長安矣。屏間四十八人。不可無廣平申子。乃時迫路遠。不能專請。懇三兄一言代之。雖不我吝。然壽集中終少大篇爲缺事。僕初念安可違耶。乞言紀事奉上。希勿吝。二兄方工應制。有暇亦賜數言。憶四月初六日。老母著命服出廳事。男女親眷二百餘人。次第進觴畢。跪告以某詩某文。某公所作。顧而樂之。家庭之間。融融如也。昨歲重修老母所居之輿亭。額曰天倫樂事。聯曰想白雲親舍之情。誰非人子。覩斑衣兒戲之狀。實獲我心。敢

爲知己道之。年來老兄學養日粹。著書必多。幸惠我指南。拙著日知錄。成而未梓。內藉名言爲重。古今計五十四人。儒言錄輯而未成。分大儒醇儒通儒名儒四類也。俱無副本可寄耳。今秋得孫徵君訊云。會從申。舅老處題數語。讀教未知達否。幸示巔末。弟可據以復徵君也。呵凍率草。不盡欲言。

答申舅盟書

廣平道上。敝州久無仕宦商賈。往還其間。惟小价每年一二次入都。討舊寓房租。囑以必向三兄官宅。問仁兄起居。回報安好。慰甚。不幸去歲遭先慈之變。苦塊餘生。勉襄大事。三冬病溼。幾無人理。所抱歉者。不孝曩於太母奠酬有闕。茲承三兄致所以奠酬先慈者。不能不感且愧耳。在仁兄何闕之有哉。捧讀唁慰。無異握手悲傷。正不知握手何日。獨念我輩所敦者道誼。所礪者學問。少年文壇。晚歲理路。天道之春夏而秋冬。聖教之博文而約禮。願與仁兄共之。故不憚言之諄切者。頃再得荆園小語讀之。知仁兄道力日堅。且日進矣。一卷之中。不孝作三分觀。見未及者一分。見及而勉行者一分。見雖及而未能行者一分也。中庸不可能一語。其至言乎。佩服佩服。若以此書廣布同學。人品心術。德造無涯。再乞惠我十冊。勿吝。昨徵君先生三致書見訊。不以不孝爲不可語。必因仁兄向在夏峰言之。故深信如此。自顧生平所學。何以克副耶。先生著書。兼收朱陸。初不可解。繼而書來。大約謂隨時補救。從易經看出。雖另具苦心。恐非百世不刊者也。又得伯巖兄消息。尤慰懷想。但未卜猶龍乃郎。能讀書上進否。附具先慈誌表二冊。奉覽存。

答劉千里書

十年懷想。尺素難通。歸養以來。邊隅僻地。麟鴻愈少矣。長安道上。從不敢一問故人。懼干功令。然於先生求友而北。半載京邸。則絕不相聞也。今年三月。從易子然處寄來手函。竟讀如晤。終以不晤爲悵耳。幸輦下高賢。留心學問者尙多。不然。厚庵往矣。誰復親切而談也哉。捧誦內篇。字字從體認中出。直與先儒互相發明。苦心備至。僕獨於學者起志求仁一則。最爲嘆服。仁誠敬三字。顛撲不破。其餘亦半在疑信之間。安能一、二面質之。而復大暢其說耶。僕山居孤陋。菽水而外。粗習方書。因老母多病。塞上無醫也。有暇。謬輯日知錄已成。又有儒言錄一書。蓋明二百餘年之理學。分大儒醇儒道儒名儒四類。各附語錄於本傳後。借以自勵。且欲粗備性理之續。惜未正有道。亦一缺事也。嗣後先生著述。爲倡明聖學計。凡涉禪語機鋒。概宜刪去。勿貽後人口實。是僕區區之誠。敢效他山者。高明以爲然否。至於僕躬行實踐。多所未能。更望先生進而教之。復有問者。先生北來。張開有並無隻字。而台札又未及開。有一言。吾開有在籍無恙否。豈不重可疑哉。願示好音爲慰。拙刻不能多寄。二幅三冊。聊述近况而已。不敢言學也。諸望精明強固。爲道自玉。

### 答劉千里書

十年始一通問。今再讀華翰。宛如握手可亭。共商學問事矣。僕自先慈去世。鬚髮多霜。無復出山之意。因召下田間。告病未允。力疾赴闕。蒙恩擢用。再補言官。夫以五十有七之弱軀。黽勉圖報。疚心良多。自期不喪生平。終是有辜聖眷。惟與都門諸君子約。只在立定脚跟。閉門守拙。反躬自考。與人爲善而已。無講學

之名可也。先生著書百卷，倡明聖宗，真不負昔日鷺湖一語。但編輯付梓，有不可不慎者。方今正學榛蕪，二氏夾雜，程朱而外，門戶各分，稍一游移，壞及世道。僕有儒言一集，不敢輕出問世，蓋慎之也。高明以爲何如？揚鄂州曠達敏捷，大是解人，恨相見之晚，惜歸去之速。此吾道一真種子也。歸舟藉候，並望爲道愛身，翹祝不盡。

答林二史

庸齋晤教，初識荊州，竊見執事宦海雖深，赤子之心未雜。望之則儼然，吾道中人也。及靜對久之，識見極高明，議論極誠實，留心請益，辨論良多，居然吾道中人矣。別後未嘗不西望而相思也。遠承下問，足切虛懷。讀書之方及所讀之書，曩曾略言之，惟治心並無他長，憶某自四十以後，粗知力行工夫，要從寡欲入手。此外有不能到處，亦有不肯到處，總不敢爲高明道也。如台下之所期許，抑亦過矣。願執事隨處涵養赤子之心，擴而充之，卽終身大業，一息千古耳。昔王文成以貴介公子，謫龍場，經瘴癘，萬死一生，纔了得動心忍性四字，雖其致良知之說不必學，然此等成就，由豪傑而聖賢，豈不快哉！張子西銘云：貧賤憂戚，庸玉汝於成，幸勉之勉之，更恕狂妄。

答連克昌進士

賤性疏懶，素寡交游，頗聞海內賢人君子，中心向往者久之。前敵州諸舍親公車歸來，備悉高致，謂風雅壇坫而外，性情尤非近今可比。每一相對，如飲醇醪，此舍親之所爲心折而樂與也。嗣聞下詢拙稿，愛屋

及鳥方愧無以仰副虛懷。復勞華翰。問及山中。始知足下曾輕信猶老及諸君之言。謬備蘭譜。以告者過也。夫足下新發之硯也。日生之陽也。才與學之所詣。俱不敢量。而又以真性情行乎其間。海內更有何詩何文。足當一面者乎。某時近炳燭矣。爲學已晚。而况失學。惟荷先帝錫類之孝。推及慈闈。俾得以疏懶之身。晨昏菽水。真天幸也。稍暇則仰體孝治。與二三父老。共明此義而已。他無敢爲高明道也。風雅事曩雖涉獵。未窺本源。比年不知何所感發。頗覺昔日之風雲月露。與筆墨了不相屬。或不得已而有作。昔則一日數篇。今則數日一篇耳。老矣。非江郎之才盡。則上蔡之顏羞也。此又足下所當擴之壇坫之下者。台札一云私淑。再云向慕。情見乎詞。然皆不敢祇承萬一。惟有朗吟佳句。在秋水蒹葭之際耳。近刻九種並步韻一章。統邀不吝。幸甚。如足下所云有志古先聖賢之道。而因以及其文詞。敬佩之矣。若云已矣無足言矣。曷敢聞命。

### 答夏祇台孝廉書

讀來教謂不肯學。而學亦不能通曉。則過謙矣。謂僕爲當代大聖賢。則過譽矣。俱不敢聞命。若云當自知之一語。何其信僕之深。待僕之厚也。夫人之失學。坐不自知耳。孔子所云是知。孟子所云良知。蓋言自知也。饑而食。渴而飲。痛而撫。痒而搔。人尙不知其饑渴痛痒。而况衾影夢寐之間。戒懼愧怍之念。如魚之飲水。冷暖誰知哉。僕由此而認之。過曰自訟。福曰自求。孽曰自作。德曰自明。道曰自得。不賢則自省。橫逆則自反。好惡則自慊。大抵從自知始。陳布衣曰。真能知之。則行在其中矣。仁兄之言。殆相合也。佩之佩之。至

於來教云。理學一端。不啻扣盤捫籥。二語偶差。敢不竭一得以效葑菲。蓋理者人心之天理。學者第覺得天理在此而行之耳。不是別處討箇理來。亦不是奔向別處學去。以我所固有之物。而扣盤捫籥。無乃騎驢覓驢乎。仁兄。吾師之子也。僕。吾師之徒也。同一淵源。而相資相信。諒必垂聽。所問願學堂一段公案。盡乎此矣。幸原亮。

與史默之進士書

自足下讀禮以來。每聞清恙。備知哭號擗踊。宅兆安厝。心力俱殫。大事克襄。安得不發發在疚耶。擬攜蔬具一解哀戚。終以未及大祥而止。然而此念積有日月矣。近者鄉人傳說。病因酒致。初不敢信。繼亦不復疑。華宗貴親嗜飲居多。進言必少。或因卜葬之後。餘慟未息。載酒相慰者有之。曩昔謹持之心。未免因人而弛。此僕所以惕然而自咎者也。夫責善告過。朋友事耳。以足下平日謙厚。視僕在朋友之上。未嘗不期其相規相勉。而僅以一日之長。加於體貌間也。又未嘗不諒其平生好直言。非諾諾於他人之是非者也。又未嘗不愛其待人之誠且敬。而樂與爲善也。以僕今日之事。則大辜所望矣。足下素有酒興。僕頗知之。而居喪後之飲與不飲。莫得而知也。日以病聞矣。僕又知之。而病之在酒不在酒。莫得而知也。第據所爲傳說者。則確甚焉。豈足下讀聖賢書。而不知麴蘖之爲害乎。溺於杯中物。而忘先人之遺體乎。舉南宮之捷而輕擲之。君恩未報。獨不一顧乎。諸弟甫露頭角。志搖搖無所向。將聽之已乎。凡此皆僕之欲信而復疑者也。惟僕之愚狂未竭。故足下之胸臆難明。說者又曰。慕劉伶阮籍之風也。僕竊惑焉。夫伶與籍。不得

志於時者也。託於酒而逃者也。千秋而下。所嗤爲放者也。足下進身之始。匪放蕩形骸之時。儒雅之流。豈比附荒淫之輩。鄉人之言過矣。返躬自思。伊誰之咎。謹以嘉言別錄一冊。奉陳左右。此數年所集節飲卻病之效。可展卷而得之也。僕言不足重。亦不足恕。惟足下重古人之言。而恕鄉人之言。僕幸甚矣。若曰。愚不諫賢。僕曷敢以諫自居也哉。

### 上李毅可巡憲書

僕人微望輕。居恆好論人物利害。曩聞執事大賢君子也。海內推許久矣。晤張伯珩先生。言及人品心術。爲今日第一。不但一方之福星。實安社稷之重器也。伯珩豈欺我哉。近見下車以來。清操惠政。大法小廉。三尺童子。無不稱爲好官者。雲中一塊土。如在春臺之上矣。蔚州則部內地也。受福尤多。感且頌者。寧待言哉。顧縉紳父老之望。而欲遂者。台騶一巡歷此地。得以盡言其情耳。不謂君命榮擢。啓行在邇矣。地方艱苦情形。有執事知之而未嘗見者。敢一直陳之。蔚地之西。舊名美良川。載在唐書。蓋言俗美而民良也。今忽訛稱爲米糧川。凡有供應之需。必取於此。豈別郡邑皆不產五穀乎。此其名美而實不副者也。蔚地在明季荒田尙少。至姜逆變後。他郡邑俱因殘破除荒。惟蔚地未經殘破。遂將本地多增徭差。撥補他郡邑五六處。譬一人可肩五六擔。安可支乎。民逃矣。地荒矣。如深沙李鄰莊羅凌等里。包賠拖累之害。日甚一日。他郡邑徭輕荒減。而又得撥補以相濟。故日見興復。蔚地徭重荒多。而又撥補以濟人。故日見蕭條。此徭一日不減。此荒一日不除。皮骨殆盡矣。且上官鋪設。不問他郡邑。而問蔚州。錢糧完解。不先他郡邑。

而先蔚州。協濟取足。不責他郡邑。而責蔚州。衙役推提。不喜他郡邑。而喜蔚州。獨豁除荒糧。徧及他郡邑。而竟不及蔚州。何也。均是朝廷之赤子。前之察荒不報者。獨視蔚民爲瘼外。忍令之死耶。今逃者死不敢歸。荒者死不敢墾。城市村堡之間。房屋拆毀者多矣。修蓋無有也。衣袴不完者多矣。縣絮無有也。此地概可知矣。猶曰好蔚州好蔚州。此其實累而名似美者也。大利大害。真艱真苦。民命所係者。遇大賢君子而不言。更言之何人。言之何日乎。諒執事至誠愛民。聞之必潸然淚下矣。所望晤諸上官。或後來當事。一備悉艱苦。爲民請命。而急救之於倒懸者。惟執事是賴也。樞從不敢爲他人致一書。而特敢直言切望於執事者。以平日相信之深。今日下問之便耳。幸垂察焉。蔚民歎四首。附呈教覽。

上曹憲副書

絕塞春回。君子道長。豐年之兆。當從人事卜之。樞之菽水耕鑿。有餘適矣。昨辱垂念。深慰慈闈。老母今年七十有八。食僅一盂。步惟一杖。更無足以得歡心者。幸託餘庇。敢報平安。若地方之窮而且荒。猶有家人父子之樂。孰非執事仁愛所貽耶。去歲秋災。得沾浩蕩。拯恤之意。無地不周。哀此窮黎。漸有起色。執事直家視雲中矣。頃因地震虎豹之異。循省不遑。探風下及。當於古大臣中求之。樞仰承明問。謬進狂言。今日地方。有不得其平而鳴之者。不在民而在讀書之輩矣。夫邊地惟讀書最難。難養生一也。難買書二也。難進學三也。其富貴之家。不須讀書而進學者不與焉。况三年一考。收錄不過五人十人。孤寒寸進。比於登天。往往父師之訓子弟者。廢書而泣。仰天而號曰。積書不如積金。何日撥雲霧見青天乎。今提學未經按



臨頒布條約。極其森嚴。可覘公道。而雲人之惓惓期望者。以有執事在上。地方招搖假藉之惡習。或可少止也。但從來干王章而壞名教。多由敗類之鄉紳。不顧士民之唾罵。固執事素所洞悉者。樞適值家居。驚聞道路之語。不勝駭然。惟有杜門靜聽。伏念士首四民。風教關焉。執事愛地方之民。必愛地方之士。士風一壞。恐大君子萬物一體之心。有所不安也。近聞東鎮蕭公較士。鐵面冰心。盡絕請託。榜發盡是孤寒。一時兒童走卒。祝世世公卿不置口。然又多彼地之鄉紳。有以成之也。執事有體有用。海內仰爲泰山北斗。豈無所以制鄉紳之劣。而成提學之高者哉。雖提學自能公道。然而相與以有成。全賴執事維持調劑於其間。下以息道路浪傳之口。上以昭朝廷取士之光。要使荒涼邊塞。不絕讀書種子。十七學中。猶有識字秀才。是執事三年來家視雲中之一大關鍵。而亦樞三年來不負故人。不欺前輩之一大關鍵也。高明必有以處此。至於樞迂腐無似。世故不通。門以外保無假藉招搖者乎。竊怍怍懼焉。祈執事留神察訪。得實則置諸法。無令膝下之名節不全。以貽老母憂。幸矣。不覺娓娓言之。前承大教。篇篇少陵。美于生一章。亟請付梓。欲爲鼓勵人心計也。且拜且祝。

### 答曹憲副書

捧讀手教。仰見執事慮周地方。未嘗一日忘雲中赤子也。前者敵州未邀浩蕩。定因薄收而無重災。不得附在諸郡邑之列。然而分賑代輸。苦心備至矣。感戴何如。幸今歲秋禾甚茂。不意隕霜頗蚤。田似成熟。實爲虛耗。苟力請入告。民心允協矣。第未知八月秋災。於部例允合否也。僕記憶事例不確。未敢懸對。仍望

高明裁酌之。至於常平賑饑。誠爲美事。但輸粟於前而變價於後。士民委以爲累。難逃洞燭。而衆口嗷嗷。歸咎於僕。及諸孝廉之首倡。此皆鄉愚不識大義者也。可無問矣。若古義倉之舉。僕曩同鄭侯課士發策。曾問及此。里人率謂難行。言詞甚鄙。大約澤鴻甫集。升斗爲艱。稍有積餘。又屬慳吝。故諄諄疑僕爲多事也。頃見執事籌畫周詳。萬物一體。後來利濟。未可預卜。而一時驚弓之鳥。開口便是難局。不領於官。則徒成畫餅。領於官。則又多一常平矣。目擊羣情。敢奉下問。今日風俗。大抵皆然。言之浩歎。不特此也。從來捐助之家。名曰義民。邇來名爲富家。此二字者。足以殺其身禍其父母妻孥而有餘。故視捐助如陷穽。然蓋不得不避也。如近日太谷縣人吳姓。枉告蔚之富民。州衛幾二十家。夫以千里以外之人。戶婚田產。風馬牛不相及也。蔚人之父子男女聞者。莫不寒心。卽在僕亦幾幾抱杞憂矣。此等刁風。一日不杜。此地百姓。一日不安。惟執事留意焉。雖因臬司濫行准理。然而造福邊民。則大君子分內事也。復娓娓言之。乞垂察不盡。

答劉貞吾總鎮書

再承大教。永禁民間運炭一事。誠蔚人之福也。在執事本無沽名之意。止期革弊甦民足矣。而蔚人之勒石者。蓋爲實非爲名也。初亦不欲以勒石聞於臺下。而涉於沽名。然不過代言輿情耳。愚見淺薄。悔之何及。雖然。陽禁而陰取。前禁而後取。皆曰沽名。執事實禁矣。永禁矣。何云沽名乎。且美事之必有名。如芳草之香。明月之影也。顧安得而辭之。若止以運炭論。上官覆被地方。一薪之產。理當供應。而不知催辦之輩。

得此奇貨。號爲美產。逐堡沿鄉。指一科十。不美之名。歸之上臺。令人有不忍出諸口者。與其受不美之名。何如沽美名而普實惠乎。况執事舉歷年之陋規。而自我除之。目前之名。既不樂居。去後之誚。何暇蚤計。此又不敢不進一言者。仰體尊意。當告之鄉民。勒石與否。聽從其便也。敬此附復。惟鑒其無他之心而已。

答朔州侯侯書

曩因賢聲如雷貫耳。友人解法周曾言。爲民請命。與上官方力爭派荒爲熟之一節。佩服益深。近從敝州李侯。得讀丁祭考議一書。此又執事經濟文章也。僕敬如神明矣。他人一登仕籍。日逐逐錢穀中。不復知禮樂爲何事。聖賢爲何人。卽孔廟祀典。輒故事應之。考議者幾何哉。僕再拜再讀。不獨於古循吏中求之。更當於古大儒中求之矣。承惠二部。一以存學宮。一以存書筥。其書內字義稍有差訛者。大抵梓人之過也。惟樂章徹饌咸和之曲。維清且旨。登獻于三二句。似誤。以本章句多而前章句少。且失韻也。按會典。果在第四章酌彼金罍之下。或不可不改正者。希再檢正。至敝州學文廟木主。年久殘缺。僅存一二。瞻拜之際。心爲恫然。今正在考修。而刊書適至。殆有啓之者耶。且大敍云。書爲范太乙先生所訂。此公言行。不愧庶席。僕藏其弟經八行圖說諸集。卽擬劄劄。以續於孝經之後。先製木主祀於文昌閣上。躬率士庶尸祝之。惟從祀有待。夢寐不忘。知執事重其人。乃敢贅其事耳。近刻八種附覽。聊代咫尺一晤。實非經濟文章之可比也。年來奉母山居。於當道概不敢通一刺。遠承惠書。誼當裁謝。解紳託在棠陰之下。頌德尤多。嗣此惟神依左右而已。

答蔚州鄭侯書

屢勞賜顧。昨登堂謝教。不覺又作長談。蓋今日賢士大夫之肯談理學者。不可多見。幸執事美質好學。超悟非常。僕雖以他山之石。願效攻玉。而反蒙啓發。獲益良多。在俗人視之。不知所談何事也。僕寧敢避嫌哉。及立談時。承諭壽屏借用僕姓名一節。此固執事重之愛之。使姓名達於上官之前。文章附在名公之列。豈不甚願。然而僕爲人之拘謹。行事之執滯。執事知之最深。即欲擴大之而不可得也。如屏幃之禁。僕於邸報中已熟知之。且詳錄之矣。昨蔚士民躋公堂而上壽。率皆出於衆情。可由而不可知也。僕日處執事幃幃之下。姓名不敢與。豈忘其德政之在蔚哉。實因日日奉教。只有致知格物躬行實踐之學。互相勉勵耳。執事現在仕途。或有不能自由者。僕家居之人。謬辱執事講堂一座。每愧格物之未明。躬行之不逮。曾以此而致辭。並辭刁先生。且勸刁先生。僕獨不自持乎。况去歲蔚人欲爲執事立德政碑。僕遂令止之。雖不言其何故。實爲現任立碑。是律令之所嚴。而非循良之所尙也。惟闔庠立願學堂碑記。其名頗正耳。僕之敬服執事者。不獨以循良望之。竊以聖賢望之矣。今壽屏一節。出於諸郡邑之公舉。僕雖不能力勸而寢其事。亦不敢不爲執事直言而正其非。若借用僕名姓。又執事主之。以格物躬行之大義裁之。可耶否耶。至於營官假借當道姓名。武人何知。無足問矣。惟執事高明。另有達觀。慎之諒之。是所望也。恃愛一字不欺。文稿容細訂另復。前致刁先生書稿附覽。

答蔚州修侯書

前聞太夫人清恙。隨附書奉候。想已大安。高年以調飲食和脾胃爲第一妙方。况執事色養全備。舞綵承歡。體慈闈之心。造百姓之福。入爲孝子。出爲慈母。以此而格神明。不卜可知也。近日夏稅秋糧一事。或外阻於督撫。或內阻於部議。以致聖主之膏澤。不下於民。仍使百姓受正月開徵之苦。而臣子安享爵祿之榮。愧耶否耶。至僕忝居言路。未能盡職。大負國恩。不如犬馬。卽早晚罷去。願與編氓同甘苦。爲盛世輸將租賦之人。又素餐之一鑒戒也。久知執事催科之中。妙存撫字。蔚民固幸甚矣。但閱撫軍達公疏云。晉省從無夏稅秋糧名色。心竊異之。如敝州夏秋地糧。其名已久。買地立契。隨帶夏秋糧石若干。昭然可考。前執事因比較之便。暫改一條鞭。仍須存夏秋之名。異日或可邀緩徵之恩耳。至切至切。附具茗果鮮菜。煩致尊堂。代候起居不盡。

### 答耿逸庵書

友道人倫之一也。知固難。交亦不易。如不佞之與湯荆峴。知之一日。而交以數十年者也。乃與先生知以數十年。而交則一日。遲早有所分。傾慕無所異也。憶昔同在班行。觀面失之。亦足見吾輩之落落難合矣。京國傳聞先生人品之正。學術之醇。自非過情。而不佞終未目覩。故淺深莫窺。景仰徒切耳。今幸不吝指示。得從諸刻中。一一領略。始深知其爲躬行實踐之學也。益肅然起敬矣。吾儒之學。大抵腳踏實地。而以虛心入之。若駁古人。騰口說。都是虛脾。終日終年。決無長進。濂洛關閩。且不必說。卽如有明貴鄉諸前輩。以理學著稱者。有一脚不踏實地者哉。先生之與荆峴。真後勁矣。今者一肩繼往開來之業。一任濟世安

民之功。此中又有差別焉。蓋傳道之心苦而樂。任事之心苦而憂。子輿氏所謂易地皆然者。是也。如荆峴者。受天子知遇。入則講幄。出則節鉞。叨榮已極。沐恩最深。在荆峴自有生平。不惟其官惟其心也。以是心居是官。甯俟吾輩代爲計。况不佞幼而失學。老而廢學。學不足資也。未司民社。未任封疆。政不足助也。獨鯁鯁過慮者。江南受荆峴之福。而荆峴受江南之累耳。姑臆言之。不取地方一錢。不徇鄉紳一情。不縱吏書一事。不尙聲伎遊覽一種。不入詩文交遊一套。此五者。荆峴所優也。民無累矣。然而屬官有蒙蔽。有貪婪。有關茸。民累一。錢糧有侵挪。有預徵。有私派。民累二。地方有過往。有抽豐。有關說。民累三。鄉紳有把持。有包攬。有交通。民累四。旗兵有窩盜。有句逃。有營債。民累五。五者。江南之牢不可破者也。在荆峴明知之。有不能不力挽而施救者矣。救得一分。則百姓免一分之累。荆峴亦去心中一分之累。此其不負天子。不負所學也。至於寬猛緩急之間。必有成畫在胸中。且以言笑不苟之端人。猶有敢於犯之者。吾不信也。高明以爲何如。不佞恪遵功令。大臣不許與督撫司道拜往接見。乃竟不敢與荆峴一別。茲承先生虛懷謙下。以刻集問學於不佞。是問道於盲也。愧甚。因率復謝教。不佞六十有八。頭暈發迷。老病無能爲矣。惟望力學敦行。爲道自愛。不佞晚得良友。幸矣。幸矣。荒言八紙。聊代面談。臨筆神往。七月初十日具復。

答宣督修滄涵

前辱大教。具悉造士盛心。感可知也。塞土荒涼。民生憔悴。兼以逆變之後。求所謂保妻孥守墳墓者。十室之中。不過一二。卽有沙田數畝。無力可耕。又安得四壁蕭然。肯讀古人書者哉。執事旣以不擾民爲整理

殘疆之要領。妻孥墳墓漸漸有之。而又以科名鼓勵我邊徼士。洵覆載之仁矣。嘉惠再頒。將謂某前日之所辭爲過矯。今日不妨作兩截人耶。是執事愛之深而知之淺矣。藉手歸上。幸諒區區。尤感明德。昨者先君子入祀鄉賢。仰承褒詔。懸之家乘。百世爲光。另容布謝。

答晉撫劉勉之

自捧詔竣暫歸。旋即入都。憶執事立身行政。不在古大臣下。某奉爲典型者。匪一日矣。伏思身在言路。以正直忠厚爲本。一味愚戇。無補興朝。固某數年以來之大愧也。若索人之小過。忌人之清操。擠人之孤蹤。汙人之大節。尤死不敢爲者。恐得罪於天日。得罪於君臣。得罪於衾影夢魂。莫可得而贖之矣。至於執事廉介自持。肝腸如雪。嘗言生平所見居官之家。祖父喪心取錢。欲爲子孫百世之計。而子孫蕩費。只如糞土。不旋踵而大禍隨之。此執事自愛愛人之格言也。尤當書紳。以志不忘。若一切是非毀譽。悉歸於天與命。而平心處之。又何慮哉。頃者循資量移。深有蚊負之懼。所自信者。心則無他。守則益堅耳。過辱雅贖。尊者之賜也。曷敢槃辭。然今日之不恭。實遵明訓。正以尊者諒其心。而他人並絕其迹。庶幾可以信朋友而答聖明矣。仰希慈照。

答郝雪海

廿年不及一晤。自是缺事。茲讀丁未見貽一書。何必覲面哉。南北海。此心此理。古今來此人此學。只是知之真。行之力。一切超脫捷悟。吾黨所斷然不敢爲者也。先生旣取其言。與行備者而學之矣。今日之遼海。

視昔日之龍場。必有過之者。幸爲吾道勉旃。僕且老矣。無能爲矣。再入長安。惟以職業酬應爲學問。妄謂卽事卽理。並言語亦可省卻。雖一時諸君子留心此道。尙不乏人。而仕宦中必能立定脚跟。不爲一切奪去者。乃可謂眞人品。乃可談眞學問矣。僕亦常與互相砥礪。有存諸心而不敢出諸口者。惟反己自修。與人爲善。八箇字耳。未審高明以爲何如。熊青嶽學士學極正。論極確。著有閑道錄。曾寓目否。惠來諸稿。容細讀之。晤教何期。終爲悵惘。

答王麗五同社

前讀大教。中心藏之矣。僕量移以後。凡至親密友片紙不收。天日鑒之。師友知之。獨足下不我信乎。僕以肝膽答足下。而足下以儀文應之。將視僕爲何如人。所望足下相照以心。不必求之區區交際間也。僕近况何足爲知己道。然亦惟足下知我爲最深。孱弱之軀。旣無濟於國事。愚拙之性。又不合於時宜。每臨節序。倍念鄉園。老母心牽遊子。藥餌難瘳。不識何日進膝下舞斑爛矣。遠辱注問。言之不覺其切耳。

與袁丹叔及門

循理守法安命。固不佞之平生也。書之座右。以自箴云。贈門下亦不出此。今之良二千石。聖朝所重也。濟兵民。籌利害。誠屬吏相與以有成者。是謂循理。一介不取。一介不與。輸運無逋欠。賢否皆以平心衡量之。守法矣。人不負官。官去留直聽之耳。他人或捷足。吾寧守拙以俟。天下之公論清議。自有命在也。不佞立身立朝。只以勿欺爲主。每清夜自檢。有一事不可告人者。卽欺也。願門下亦力行之。此後當令愛我者起。



敬而惡我者增愧矣。近來功令嚴切，不佞奉持逾不敢後視門牆諸子。聞問所及，尙在情理之中者，悉絕之。恐諸君損其清俸，無以養廉。且誨之貪也。豈所愛於門牆哉。不佞望白雲未遂，殊難自慰。惟門下善自珍愛，幸甚。

### 與沈季子及門

天末音信稀少，兼以恪守功令，未能裁訊。書中拮据勞瘁，保全巖疆，六載飲冰，偃蹇如故等語，固足以報朝廷而慰知己矣。若遷擢之事，命所定也。直聽之可耳。不佞素有六字銘曰：循理守法安命，願與同志者共之。前聞門下爲地方受過，微有註誤。近閱邸報內，各省俱有奏明參罰諸疏，仰見聖政之寬大。未嘗以原無姓名之盜賊，久累人才也。真門下之幸哉。獨不佞報國無能，養親有愧，所自信者，誓不收親友片字。雖及門聞問尙在情理中者，悉絕之。正恐諸君損其清俸，無以養廉也。不恭幸諒我。

### 答張開有及門

作吏維艱，又值繁劇，風塵之狀，果何似乎。所信者家有老親，守身如玉，孝子之心，較世人以富貴榮親者，大相逕庭也。不佞矢不受及門一錢，不通外官一字。正所以慰高堂倚閭之懷耳。門下得無相同耶。令親手畫羅漢爲宰官現身說法，意深哉。紬出家織，非官中物也。勉留四疋，以供春服。餘悉附還。幸諒我心。拙詩二幅，率筆言意，諸惟珍愛。

### 答聶輯五同年

驄馬西行。每深懷想。所不敢以尺素候起居者。祇因恪守功令。誓於寒暄通問。悉謝絕之。遠辱相念。心矢明德。酒資藉手奉還。非自外也。諒之諒之。惟望執事執法如山。守身如玉。愛民如子。去蠹如讐。誨屬吏如師之教。弟閱招詳如弟之親師。薦舉賢良如讀古人得意之書。君命可以不辱矣。僕近狀碌碌。有循分盡職已耳。何足爲高明道哉。

與易子然及門

接來書。知門下愛民造士。疏引通郵。斑斑皆惠政也。在門下固不我欺。而不佞信門下之心。尤勝於信道。路之口。循理守法。安命六字。門下其力行矣。敬服敬服。清俸僅足自贍。分以惠我。何忍受之。且弟子之報師長。以立身行道。不辱門牆爲尙。儀節非所尙也。祇登葛布。用驅炎暑。餘悉附還。老母入夏以來。飲食倍少。晨昏缺然。不孝之愆。無可免矣。承念志謝。

與馬步先廣文

朝廷設學校之師。以訓此一方士。率皆老明經爲之。日暮途窮。神昏志惰。教思無望矣。間有孝廉就教者。一列廣文。便自詡曰。我乙榜也。不與人同。州縣官亦往往推重之。以批狀詞。通請託爲作興。以交劣衿。恣狂態爲疏放。嗟乎。孝廉之稱。自此衰矣。何足爲師耶。今日之用甲科者。特例也。其前途遠大。所謂作興疏放者。固不屑爲。而喫緊在孝弟節義四字。循循誘人。察諸生內某某孝則敬之。某某弟則愛之。某某節則表揚之。某某義則崇獎之。務俾人人聞風而起。吾道尊矣。吾職盡矣。濟貧扶弱。其次也。講學課文。又其次

也。至於開報行劣。如賭博武斷。顯過可指者。聊示薄懲。予以自新。其一切閨闈曖昧之事。不得妄聽傳說。指爲過端。本以興教化。而反以傷教化也。慎之慎之。每得一孝弟節義之士。則書其名。告於先師。紀其事。黏於明倫堂壁。與衆見之。其爲玉筍令兄所詳言者。不敢再贅。

### 與王允大及門

不佞愚拙甚。與門下之勉於道義也。非一日矣。每事不可以告人。不可以告天者。皆不敢爲。愛名節而重身家。實所以安老母之心。不敢灑遊子之淚也。不佞屢以清白報知己。使天涯落落之人。儻有諒其肝膈而略其形骸者。卽大幸矣。遠辱來訊。知我更深。能無感激。但清俸幾何。分以贈我。不識門下何所賴以自贍乎。若因交際難割。有毫釐取之地方者。不但壞門下清白之操。反以貽不佞門牆之累。自愛愛人。俱失之矣。宜以爲戒。嗣勿再來。門下勞於簿書已久。此後若無參罰。或可望一進步。循理守法安命六字。益當兢兢奉之。不則懷懷然得以保縣令而歸。亦庶幾祖父不受辱。子孫不致禍耳。惟熟思爲慰。

### 與周芑穀及門

別况各懸。音問遠隔。幾年矣。不佞前歲予假歸省。抵里甫兩月。幸老母病痊。不佞忽大病。臥牀者十閱月。幾至不起。當事代題請告。因引例未合。部議不允。勉扶入都。無缺可補。半年無薪俸之養。八口有索米之艱。從家鄉湊泊資斧。迎養萱闈。以供菽水。庶免兩地憂牽。亦可就醫調養。杜門謝客。檢藥讀書。不問門外事也。斷絕交際之初志。堅不可奪。惟幸而慰慈顏者。又生兩子。不幸而傷慈心者。反孀長兒。或亦生不

德之所致也。若一官之遲速有無。聽之彼蒼而已。曩從邸報中。見門下年來政績。屢騰薦牘。竊喜公道尙存也。近日毀言忽至矣。果能自反無愧。罷職何辭。奉養八十之老親。教訓弱齡之幼子。耕數石田。以終其身。真是福量不小。此等結局。乃他人望而不可必得者。門下嘗云。行止在天。義理自守。吾今敬服矣。仕宦二字。萬不可置之胸中。掛之齒間。功令嚴切。仕路與林下。悉當警戒。念之念之。

柬畢亮四同年

長者。僕之畏友。嚴師也。聞賢聲與岱嶽齊。都下紳士大夫。及兒童走卒之口。無異說。知非邀譽者。昨卓異之選。與固榮不與何辱哉。僕常問客某某做得官否。曰做得。又問做得人否。客無敢答者。做官做人。是一是二耶。高明聊當自慰。僕之畏且嚴。益不敢稍後矣。

答申臯盟處士

林密山深。故人高臥。喜可知已。客春聞有都門之遊。適爲僕歸里抱病臥牀時也。伏枕請告。幸當道代題。謬謂可以終老邱壑。常在慈母膝下矣。嗣因部覆不允。扶病來京。檢藥抄書。閉門謝客。既無田園之慮。復近市朝之間。官守言責。都不干涉。又謂可以依光日月。稍慰慈母憂懷矣。人之相知。貴相知心。如佳句所云。宦小得容身。行藏問老親。鮑叔知我哉。日來與殷伯巖坐十懶齋中。促膝清話。進我於道者頗多。猶恨相見之晚。且山中有事。不及慰留。足下贈我以友。而不能攜我於聰山之下。惆悵何已。敬次來韻一章。兼附近咏一帙。此道深遠。非商訂不敢自信。僕每見今人古詩。依傍古人之意格。而不能自出手眼。自行斷

制者輒以釘釘目之。未審是否。七律勤作。益知其難。寒儉肥癯。兩者交失。不得不求之真實。願真則太盡。實則不活。其失等耳。津岸茫然。雖掩卷長歎。究何益哉。惟高明教我。

與王東皋同年

僕志大才疏。無當世用。忝附同年。碌碌不足短長。辱朝廷而羞知己。自知明甚。躬耕養母。冀安愚分。不謂蠹朽之材。聖朝不棄。扶病而北。勉綴班聯。主恩厚矣。真感極而繼之以泣也。入都以來。竊見賢者在位。君子道長。慶幸之私。形於顏色。緣僕大病初起。長途溼熱。孱孱之軀。委不能勝。以致手足腫裂。膿血淋漓。望闕瞻依。身難赴部。走役投遞職名。循往例也。細人沈閣。曷足深怪。今閱五十日矣。而見朝終無定期。禮云。出必告行。反必告面。家庭且然。况君父之義乎。昨辱足下枉顧榻前。方知說堂必須印文保結。此或未經申明之近例也。又僕詳閱吏部准假原劄。止云假滿赴部。並無起送保結字樣。似乎京官假滿。較之服闋還職等項。防短喪。防假冒者。例有不同也。且僕非無印文也。總督咨達吏部。內開起程赴部日期。頗悉。說堂之可據。不可據。非僕之所敢知也。若兵馬司保結之說。特不得已者而曲爲之計耳。僕地非原籍。官非屬下。突然而乞保結。未必卽與。與矣。而京堂末員。手持小吏片紙。以博一官。亦傷吏部之體也。敢煩長者再一熟思之。僕惟有仰遵赴部之旨。扶掖見部。靜聽酌奪而已。此後之事。安於義命。不敢問矣。亦知非足下職掌。因叨知愛。又景高賢。故責望之如此。輕瀆之罪。伏祈垂察。於宥。

答胡東甌同年

昨一力走上谷。敬候道體安好。且以告雲門至蔚之期也。仰知長者新愈之餘。十分珍攝。若寒家一譜。勞靜中起居。此心何安。讀書吟詩寫字。皆費心力。誠如孔子所謂游於藝也。則得之矣。所教大有了悟云云。此當在平日。不在病際也。凡穎悟無工夫者。易墮禪學。固知足下了悟在平日也。服服庸齋言。煩指示親切。愧無足當藥石者。奈何。奉懷一律。情見乎詞。惟正之。

答李繪先

弟自邀恩歸養。一刺不敢入都。得手教。始知台下去冬北上矣。詢及近况。捧讀書紳諸集。諒所云身心性命。歸落有在。乃復問道於盲耶。夫身心性命。歸落在齊治均平。卽大學之明德新民。止於至善也。外是則二氏之學。吾不知之矣。竊見老年翁存心立言。無一不善。孔子云。言之不出。恥躬不逮。又云。願言願行。願知已於行字著力。直接吾鄉文清公一派。去聖道不遠。此處是真歸落矣。粗縑匪敢言答。並附家刻。統照及。

東程學博

前以心喪三年之義請教。接台翰。是論制服。非心喪也。竊謂心喪者。追憶不忘。三年有如一。日。其冠裳服飾。以及婚嫁宴會。事事無所拘滯。儻遇平日受教之地。惻然有動於中。如手澤口澤之存。如終身忌日之感。是也。過三年。又如朋友之墓。有宿草而不哭矣。此皆因義而類推者。士君子有心。則有喪。無心之人。安問喪哉。故曰。弟子爲師。心喪三年。其義蓋深且遠也。愚見如此。再折衷何如。

